

LORTZERIK IZANGO EZ DUTEN ERREGULARIZAZIO BAT AGINDU DIETE MAROKOKO MAFIEK

Etorkin magrebiarren oldea 1992koaren parera iritsi da

Espainiara legez kanpo sartu nahi duten afrikarren atxiloteta izugarri handitu da azken asteetan Gibraltarko Itsasartearen inguruan. Atzo goizaldean, hiru ordutan, 103 etorkin harrapatu zituen Guardia Zibilak.

Erredakzioa / Donostia

GOIZEKO 05:30etatik 08:30etara bitartean lau txalupa atzeman zituen Cadizko Guardia Zibilak Tarifa inguruan. Untzi horietan Gibraltarko Itsasartea zeharkatu nahi zuten 103 magrebiar zeuden, marokoarrak ia guztiak. Guardia Zibilak Algecirasko Poliziaren esku utzi zituen etorkinak beren herrialdeetara kanpora ditzaten.

Uda hasi zenetik Cadizko probintziako kostan 600 afrikarretik gora harrapatu dituzte Espainian egoteko baimenik gabe. Urtea hasi zenetik, berriz, 1.150 inguru atxilotu ditu Guardia Zibilak Tarifatik Algecirasera bitarteko hondartzetan edo bertako uretan. Beste 600 inguru ere atzeman dituzte Cadiz eta Almeriako bide bazterretan ihesi zihozazela. Atxilotu gehienak marokoarrak dira, baina aljeriarrak ere ugari dira. Kopuru horiek oso parekoak dira dagoeneko 1992an izandakoekin. Urte horretan atzeman zuten txalupa gehien itsasartean, eta 2.000 etorkin inguru harrapatu zituzten. Dozenaka, berriz, bidean geratu ziren. Cadizko hondartzetan gorpu ugari azaldu ziren, eta beste hilotz batzuk itsasoak eraman zituen.

Nolanahi ere, Etorkinekiko Elkartasun Plataformak uste du polizi indarrek legez kanpo helitzen diren etorkinen laurdenak baino ez dituztela atxilotzen.

Erregularizazioaren gezurra • Aurtengo etorkin oldea azaltzeko hainbat arrazoi eman dituzte. Batetik, uda honetan aurrekoetan baino eguraldi hobea egin du



Itsasartean harrapatutako etorkin magrebiarrak Algecirasera bidean.

EFE

Gibraltarko Itsasartean, eta errazagoa da txalupaz zeharkatzea. Bigarrenik, agintari espainiarrek uste dute Marokok bere kontrolak murriztu dituela. 1992ko udaren ostean, Hassan II. Marokoko erregeak plan bat jarri zuen martxan itsasartea zeharkatu nahi zutenak jazaritzeko. Errepresioarekin batera, plan horrek aurreikusten zuen Europako Batasunak hainbat inbertsio egingo zituela Marokoko iparraldean bertakoen bizi maila hobetzeko. Baina dirua ez zen sekula heldu, eta horregatik pentsatzekoa da Marokoko Gobernuak neurriak lausotu egin dituela.

Baina arrazoi nagusia beste bat da: pertsonen trafikoa kontrolatzen duten Tangerko mafiek etorkinei ziurtatu diete hilaren 23a baino lehen heltzen badira Espainiara bertan bizitzeko baimena lortuko dutela. Izan ere, gaur zortzi amaituko da Gobernuak Espainian aspaldian bizi diren etorkinei beren egoera legezatzeko emandako epea. Beren egonaldia erregularizatzeko duten bakarrak dira 1996ko urtarrilaren 1a baino lehen noizbait Espainian lan egiteko edo bizitzeko baimena izan dutenak edo hauen gertuko senideak. Beraz, azken hilabeteetan Andaluziara heldu diren etorkinek apenas

izango duten aukerarik datozen egunotan beren egoera legezatzeko. Tangerko mafiek etekin handia ateratzen diote gezur horri, itsasartea zeharkatu nahi duenak 200.000 pezeta inguru ordaindu behar dielako.

Bestetik, Nazio Batuetako (NBE) Giza Eskubideetarako goi komisionatuak, Jose Ayalak, atzo gaitzetsi egin zuen Espainiak 103 etorkin drogatuta kanporatu izana. Berriz halakorik ez egiteko eskatu zion Ayalak Espainiako Gobernuari, «giza duintasunaren aurkakoa» delako. NBEko ordezkariak esan egin zuen kasu honen inguruan ez duela salaketarik jaso.

Debre: «Txantajea onartzea koldarkeria da»

Efe / Paris.- Jean Louis Debre Frantziako Barne ministroak nahiko argi utzi zuen atzo, egunkari bati eskainitako elkarrizketan, Parisko Saint Bernard elizan dauden etorkin afrikarrak kanporatu egingo dituztela. Elkarrizketan Debrek dioenez, ezinezkoa da 304 afrikar hauen egoera legezatzzea, «txantajeari amore ematea koldarkeria eta erabaki tragikoa izango litzatekeelako».

Barne ministroak ziurtatu zuenez, legezatzeko moduan ziren afrikarrei —1993a baino lehen Frantzian jaiotako haurren gurasoak— dagoene-

ko eman zaizkie paperak eta beren egoera zuzendu da. Besteena, aitzitik, ezin du konpondu, «inmigrazio kontuetan dauden legeak argi eta garbi bortxatzea izango litzateke eta». Debrek kritikatu egin zuen ezkerreko zenbait talde «etorkinen miseria oso azkar baliatzen» direla.

Ministroak bere oporretan prentsan esandakoak berehalako erantzuna jaso zuen Saint Bernard elizan. Afrikarren arabera, koldarkeria ez da ministroak esandakoa, «Frantzian jaiotako haurrak ezagutzen ez duten herrialde batera eramatea» baizik.

Etorkinek gogorarazi zuten gehienak legea errespetatu sartzu zirela Frantzian eta bertan hiruzpalau urte egin dituztela lanean, zergak eta kotizazioak ordainduz. Prefetek Frantzian bizitzeko baimenak ez berri-tzea erabaki zutenean geratu ziren, beraz, legez kanpo.

1993an Charles Pasquak, orduko Barne ministroak, prestatutako legeak eta ondoko urteetan Debrek berak eta Jacques Toubon Justizia ministroak hartutako ebazpenek asko gogortu dute etorkinen bizimodua. 1993az geroztik, dagoe-

neko ez da frantziarra Frantzian jaiotzen den haur oro; aitzitik, 16 urtera arte itxaron behar du bere herritartasuna zein den erabakitzeko. Tartean, bere gurasoei kanpora kanporatzeko arriskua du. Seme-alaba frantziarren guraso etorkinen egoera ere txarra da: ezin dituzte kanporatu familiak hastera ez delako legezkoa, baina ezin dituzte legezatu. Urte horretatik aurrera ere, Frantzian bizi den etorkinak ezin du bere familia ekarri, eta epe luzeagoa behar da frantziar batekin ezkondu eta etorkinak frantses bilakatzeko baimena jaso dezan.

Fronte Nazionalaren gustuko neurri hauek guztiak atzera botatzeko eskatzen dute giza eskubideen aldeko taldeek eta Saint Bernard eliza ekainaren 28az geroztik okupatzen duten afrikarrek. Etorkin hauek dei egin zieten atzo berriz ere frantziarrei beren aldeko manifestazioetan parte har dezaten edo Saint Bernardera hurbil daitezen. Izan ere, pentsatzen da Gobernuak zubi hau baliatuko duela afrikarrak elizatik atera eta Afrikara bidaltzeko. Kanporatzea atzo gauean edo gaur gauean izango den beldur dira etorkinak. X

laburrean

■ Jose Rossik erabiltzen duen egoitza batean bonba jarri dute

LEHERGAILU batek eztanda egin zuen atzo goizaldean Aiacciuko kanpoaldean. Jose Rossi Hego Korsikako Kontseilu Nagusiko presidentek erabili ohi duen egoitza batean. Bonba Pietri etxaldeko balkoi baten azpian jarrita zegoen, eta eraikuntzako harri gela eta ondoko gela batzuetan kalteak eragin zituen. Biktimarik ez, ordea. Joan den asteazkenean beste bonba batek eztanda egin zuen Aiacciuko Justizia Jauregiaren aurrealdean. Atentatuok oraindik ez ditu inork bere gain hartu. X

■ Greenpeacek Montcada i Reixaceko errausteko planta gerarazi du

GREENPEACEKO kideek atzo zenbait ordutan gerarazi egin zuten Montcada i Reixac herriko (Bartzelonako) hiri hondakinak errausteko planta. Ekologistek salatzen dutenez, errausteko plantak oso kutsagarriak dira, atmosferara dioxinak isurtzen dituztelako. Greenpeaceko bi kide hondakinaren zuloan sartu ziren bitartean, beste aktibista batzuek Stop dioxinak, birziklatzea oraintxe zioen pankarta zintzilikatu zuten lan-tegiaren alde batean. X

■ Kaleetako bideo kamerak kentzeko eskatu dio PSCK Generalitateari

CALAFELL (Tarragona), Vilasar de Mar eta Canet (Bartzelona) herrietako kale batzuetan jarrita dauden bideo kamerak aldi baterako kentzeko eskatu zion atzo PSCK Kataluniako Generalitateari. Josep Maria Sala senadore sozialistak gogorarazi zuenez, CGPJk ebatzi berri du zenbait baldintza berezitan baizik ezin direla kamerak kalean jarri. Katalunian baldintza horiek ez direla betetzen iritzi dio Salak, eta legea egin arte bideoak kentzeko eskatu du. X

■ CDSko diruzainek diotenez, buruek bazuten finantzaketa ezkutuaren berri

JEAN ARTHUIS Ekonomia ministroak, Jacques Barrot Lanekoak eta Pierre Mehaignerie Justiziako ministro ohiak bazekiten CDS bere alderdia (Force Democratique) era ezkutuan finantzatu zela 80ko hamarkadaren amaieran. Hala esan zuten, behintzat, Jean Pierre Zanoto epailearen aurrean buruz buruko deklarazioa egin zuten CDSko diruzain izandako hiruk, atzo Le Point aldizkariak kaleratu zuenez. X